

दिनांक 08.11.2024
समय: 18.45 बजे

आकाशवाणी जयपुर—अजमेर
प्रादेशिक समाचार

राष्ट्रपति द्वौपदी मुर्मु सरकार री भ्रष्टाचार रे खिलाफ जीरो टॉलरेंस नीति सूं देश मांय भ्रष्टाचार रे जड़ सूं खत्म होबा री आस जताई।

खान अर पैट्रोलियम महकमा रा राइजिंग राजस्थान प्री—समिट मांय 63 हजार 463 करोड़ रुपया रा एमओयू व्हीया।

प्रदेश रा सात विधानसभा हलकां मांय उपचुनाव रे दौरान करी जा री कार्वाई मांय हाल ताई 92 करोड़ रुपया सूं बत्ता री नकदी अर अवैध शराब री जब्ती।

केन्द्र सरकार री राष्ट्रीय शिक्षण सप्ताह पहल, कर्मयोगी रे तैत अहलकारां अर कर्मचारी 38 लाख घंटा सूं बत्ता रो प्रशिक्षण लियो।

000

राष्ट्रपति द्वौपदी मुर्मु आस जताई कै सरकार री भ्रष्टाचार रे खिलाफ जीरो टॉलरेंस री नीति सूं भ्रष्टाचार जड़ ऊं खत्म व्हे जावेला। वे कया के भारतीय समाज मांय सच्चाई अर अनुशासन ने जीवन रो आदर्श मान्यो जावे है। राष्ट्रपति आज नई दिल्ली मांय केंद्रीय सतर्कता आयोग कानी ऊं सतर्कता जागरूकता सप्ताह रे मौके राख्या कार्यक्रम ने संबोधित करता थका कया के भ्रष्टाचार एक बीमारी है अर जिण ने समूल खत्म करयो जाणो चाहिजे।

000

राष्ट्रपति कया के सरकार भ्रष्टाचार सूं निपटबा खातर कई कदम उठाया है। वे कया के कार्वाई मांय देरी या कमजोर कार्वाई असामाजिक लोगां ने बढावो देवे है। हालाँकि वणा इण बात माथे जोर दिया के हर काम अर हर जणा ने शंका री निजर सूं नी देखणो चाहिजे। वे कया के किंणी भी कार्वाई रो मकसद समाज मांय न्याय अर समानता ने थापित करणो व्हेणो चाहिजे।

000

मुख्यमंत्री भजनलाल शर्मा खान अर पेट्रोलियम हलका रा निवेशकां सूं आवती राइजिंग राजस्थान समिट मांय बत्ता ऊं बत्तो निवेश रा प्रस्ताव रे सागे आबा ने कया। वणा महकमा रा राइजिंग राजस्थान प्री—समिट मांय कया के राज्य मांय औद्योगिक निवेश रे मुजब माहौल बणायो जाणो चाहिजे, जिण सूं प्रदेश मांय माली विकास अर रुजगार रा मौका बढे। इण मौके 63 हजार 463 करोड़ रुपया रा एमओयू माथे दस्तखत कर्या गया। मुख्यमंत्री कया के राज्य मांय माइनिंग सेक्टर री खास भूमिका है अर नई खनिज नीति निवेश खातर तैयार है। दिसम्बर मांय होबा वाढ़ा राइजिंग राजस्थान ग्लोबल इन्वेस्टमेंट समिट मांय देश—विदेश रा निवेशक भाग लेवेला। समिट मांय राज्य री खनिज संपदा, औद्योगिक विकास अर रुजगार रा मौका माथे चर्चा व्हेला। मुख्यमंत्री कया के राज्य मांय एक लाख 41 हजार 184 करोड़ रुपया सूं बत्ता रा निवेश प्रस्तावां माथे दस्तखत व्हे चुक्या है। इण बीच आज राजधानी मांय जयपुर जिला रे अलावा जयपुर ग्रामीण अर दूदू री इन्वेस्टर मीट राख्यी गई। अजमेर अर केकड़ी मांय राख्यी जिला स्तरीय इन्वेस्टर मीट मांय उपमुख्यमंत्री दिया कुमारी मौजूद री। अजमेर मांय मीट रे दौरान 14 हजार करोड़ सूं बत्ता रा एमओयू व्हया।

इण मांय मार्बल, ग्रेनाईट, टैक्सटाइल, चिकित्सा, शिक्षा, होटल अर रिसोर्ट, खनन, सोलर, एग्रो, फूड, इंफ्रास्ट्रक्चर समेत दूजा हलकां मांय नुवा कारोबार री थापना रा प्रस्ताव भेजा है। आं कानी ऊं करीब 15 हजार सूं बत्ता लोगा ने रुजगार मिलेला। केकड़ी मांय 3 हजार करोड़ रुपया सूं बत्ता रा 239 एमओयू साइन कर्या गया। इण मौके उपमुख्यमंत्री दिया कुमारी कथा के राइंग राजस्थान इन्वेस्टर मीट राज्य मांय औद्योगिक विकास अर रुजगार बढाबा री दिशा मांय महताऊ कदम है। वे बतायो के राज्य मांय निवेशकां खातर चावतो व्यापारिक माहौल बणायो जा रियो है।

000

भीलवाडा मांय व्ही इन्वेस्टर मीट मांय जिला री प्रभारी अर महिला बाल विकास मंत्री मंजू बाघमार शिरकत करी। वण मीट रा बारा मांय जाणकारी दी।

000

विधानसभा अध्यक्ष वासुदेव देवनानी आज ऑस्ट्रेलिया रा कैनबेरा माथे ऑस्ट्रेलियन पार्लियामेंट मांय विरोधी दल रा खास सांसद अर पैली रा मंत्री अलेक्स हॉक सूं मुलाकात करी। श्री देवनानी अर श्री हॉक भारत अर ऑस्ट्रेलिया री संसदीय प्रणाली रा विकास मांय संसदीय पद्धति अर प्रक्रिया री भूमिका, लोकतांत्रिक प्रणाली अर शिक्षा अर पर्यटन समेत दूजा हलकां मांय निवेश री सम्भावनावां माथे चर्चा करी। इण मौके श्री देवनानी बताया के राजस्थान मांय राइंग राजस्थान ग्लोबल समिट 2024 राख्यी जा री है।

000

राज्य मांय विधानसभा री सात सीटां माथे होबा वाळा उपचुनाव रे दौरान साफगोई सूं चुनाव करबा खातर आदर्श आचार संहिता री कड़ाई सूं पालना करी जा री है। चुनाव रे दौरान गैर कानूनी नकदी, शाराब, नशीला पदार्थ अर दूजी चीजां रे मुफ्त बांटबा माथे कड़ी निजर राखी जा री है। न्यारी न्यारी प्रवर्तन एजेंसियां अर निगरानी दल इण चीजां री धरपकड़ खातर मुश्तैदी सूं काम कर री है। 7 जिला मांय हाल तांई कुल 92 करोड़ 68 लाख रुपया री नकदी अर गैर कानूनी शाराब समेत दूजी सामग्री पकड़ी गई है। मुख्य निर्वाचन अधिकारी नवीन महाजन बताया के निर्वाचन आयोग रा निर्देशां रे मुजब कार्यवाही करता थकां राज्य पुलिस सब ऊं बत्ता 76 करोड़ रुपया रा मोल री जब्ती करी है। वे बताया के सगळी सभी एजेंसियां 7 जिलां मांय कुल मिलाकर 4 करोड़ 22 लाख रुपया रा नकद रोकडा पकड़्या है। इण दौरान साढे 5 करोड़ रुपया सूं बत्ता मोल री गैर कानूनी शाराब अर 42 लाख रुपया कीमत री नशीली चीजां भी जब्त करी गई। करीब सवा करोड़ रुपया रा सोना—चांदी अर दूजा सामान बरामद कर्या गया है।

प्रदेश मांय उपचुनाव वाळा विधानसभा हलका मांय मतदाता जागरुकता खातर न्यारा न्यारा कार्यक्रम व्हे रिया है। दौसा मांय जिला स्वीप टीम एक संस्था री इमदाद सूं मतदाता जागरुकता कार्यक्रम राख्यो। इण मांय नुक़ड़ नाटक “लोकतंत्र में नारी की भूमिका”, मतदान गीत री प्रस्तुति दीनी।

झूंगरपुर जिला रा चौरासी विधानसभा हलका मांय चुनाव री तैयारी बाबत जिला निर्वाचन अधिकारी अंकित कुमार सिंह सगळा प्रकोष्ठ रा प्रभारी अधिकारियां अर सहायक प्रभारी अधिकारियां री बैठक ली। कलेक्ट्रेट सभागार मांय व्ही इण बैठक मांय जिला निर्वाचन अधिकारी हाल तांई करया गया कामां री जाणकारी ली।

000

राज्य सरकार ऐलान करयो है के काश्तकारां री आमदनी बढावा खातर लम्बा टेम रे वास्ते सहकारी कृषि अर अकृषि ऋण ब्याज अनुदान योजना रे तैत कृषि कर्जा माथे बरस 2024–25 खातर 7 फीसदी अर अकृषि कर्जा माथे 5 फीसदी ब्याज अनुदान दियो जावेला। या सब्सिडी बरस 2024–25 रे दौरान दिया गया कर्जा ने टेम माथे चुकाबा वास्ते दियो जावेला। सहकारिता राज्य मंत्री गौतम कुमार दक बताया के इण योजना रे जरिये टेम माथे अपरा कर्ज री किश्तां रो भुगतान करबा वाळा काश्तकारां ने बढावो दियो जावेला।

योजना रे लागू होबा सूं किसान आधुनिक खेती अर भूमि सुधार कर आपरो उत्पादन बढा सकेला। इण बाबत कुल उन्नतालीस करोड़ 75 लाख रुपया रो प्रावधान कर्यो गयो है। योजना रे तैत किसान पम्पसैट, फब्बारा/ड्रिप सिंचाई, विद्युतीकरण सारू कर्जा ले सके है।

000

प्रधानमंत्री फसल बीमा योजना रे तैत लंबित बीमा क्लेम रा निपटारा खातर राज्य सरकार कोशिश कर री है। कृषि मंत्री डॉ. किरोडी लाल मीणा अहलकारां सूं कथा के वे आ रो बेगी निपट्यो करे। बरस 2017 ऊं 2022–23 तांई बीमा कंपनियां मांय करीब 77 करोड़ 98 लाख रुपया रा बीमा क्लेम लंबित है। इण बाबत कृषि पर्यवेक्षक अर सहायक कृषि अधिकारी कैम्प लगा र काश्तकारां रा जरुरी दस्तावेज इकट्ठा करेला। राज्य सरकार जिला कलेक्टर री अगुवाई मांय बैठक राख र नवंबर 2024 तांई इण भांत रा बीमा क्लेम रा बेगी

हल काढबा ने क्या। श्री मीणा क्या के केंद्र अर राज्य सरकार काश्तकारां ने मजबूत अर खुशहाल बणावेला।

000

केन्द्र सरकार री राष्ट्रीय शिक्षण सप्ताह पहल, कर्मयोगी रे तैत अहलकार अर कर्मचारी 38 लाख घंटा सूं बत्ता रो प्रशिक्षण लियो है। कार्मिक, लोक शिकायत अर पेंशन मंत्रालय एक बयान मांय क्यो के 19 सूं 27 अक्टूबर ताँई मनाया गया शिक्षण सप्ताह रे तैत 45 लाख सूं बत्ता कोर्स शामिल कर्या गया है। इण दौरान औसत दैनिक पाठ्यक्रम पूरो करबा वाळां री तादाद बढर 3 लाख 55 हजार व्हे ग्यी। इण मांय 4 लाख 30 हजार प्रतिभागी सीखबा खातर आपरा कम ऊं कम चार घंटा दे रिया है।

000